

欽定大清會典事例

欽定大清會典事例卷一千一百三十九

八旗都統

優恤官兵恤賞

官兵恤賞○雍正元年奉

旨發內帑銀八十萬兩分給八旗以資官兵婚喪之用  
欽此遵

旨議定八旗護軍校驍騎校前鋒護軍領催等婚嫁事  
給銀十兩喪事給銀二十兩馬甲婚嫁事給銀  
六兩喪事給銀十二兩步軍及食一兩錢糧之  
執事人等婚嫁事給銀四兩喪事給銀八兩其

喪事如祖父母父母及妻子准給予。若子孫衆者但視其應得之一人給予。至兵丁等病故或無子及其子尚幼。即視其本身所應得者給予承辦之人。娶妻視本身差使。如係閒散亦照嫁女例給予其父及承辦其事之人。戶下兵丁人等不准給予。凡遇婚喪等事。令該參領族長查明具保支領。如有虛冒等弊。將具保之人交部議處。○二年奉

旨。尚膳尚茶執事人等。均屬緊要。其侍衛著照護軍校驍騎校例。拜唐阿著照護軍前鋒例。遇有婚喪之事。

給予恩賞銀。再此項銀若於五日一次支領。恐貧乏兵丁。其喜事尚可稍待。若遇喪事。必致窘迫。著八旗滿洲蒙古都統等。合支銀五百兩。存貯公署。一遇有事。即行給發。其事件緣由及所給銀數。於月終造具清冊。咨內務府彙覈。本月餘銀幾何。即於下月應領五百兩數內扣除。裁領存貯。○三年奉

旨。八旗所給恩賞銀。官員之子弟。有給予者。有不給予者。夫推恩賞賜。理當畫一。即如貧乏筆帖式等。以其為部院官。不令給予。似屬難行。此必八旗大臣有意節省耳。大約每旗每月不過領銀千一二百兩。即可

足用。著八旗大臣詳議具奏。欽此。遵。

旨議定。護軍校、驍騎校、看守城門等官，並部院衙門筆帖式、同護軍前鋒及正身領催馬甲執事人等，一例給予。

恩賞銀。○八年奉。

旨聞得八旗現將自首開戶養子，在拔護軍馬甲之人，於婚喪事裁革恩賞。此開戶養子，特為註冊者，原以免佐領人等互相訐告訛詐之事，並未降旨革退。今伊等仍照常當差，該都統等並不具奏，即行裁革，甚屬錯謬。既令兵丁自首，復裁革恩賞，誰復據實自首。

著仍給予恩賞。○九年議准。

恩賞銀。除現在五品以上官員子弟不准給予外。其已故官員之子弟。伊本身在何處行走。照伊本身給予。無嗣孀婦病故。其承辦之人在何處行走。亦照伊本身給予。○十年議准。年老患病告退人等無嗣身故者。有族人承辦。照本身所應得給予。如有子弟未當差者。亦照前給予。若無族人承辦。交該佐領亦照本身所應得給予。○乾隆元年議准。八旗漢軍每旗給生息銀二萬五千兩。共銀二十萬兩。將每月所得息銀交納。

內庫以備八旗漢軍支領。再八旗漢軍佐領既多寡不同。則

恩賞銀亦應酌量增減。應令鑲黃正黃正白三旗漢軍都統。每旗每月於內務府支領生息銀三百兩。其餘五旗每月支領銀二百二十兩。均照滿洲蒙古例給予。仍於歲終彙奏。並知照內務府覈銷。又議准八旗閒散人內。如係自幼殘廢不能當差。或無嗣。或子弟幼小。遇本身及妻病。故子女婚嫁之事。均照馬甲例給予。閒散人之子女。幼失怙恃。雖有伯叔兄長。皆係閒散。或寄

養在族屬及姒親佐領下者。遇婚嫁時。均照馬甲子女給予。○又議准。因殘疾由軍前駁回。裁退錢糧兵丁。如娶妻及子女婚嫁。或本身及妻病故。准照原食錢糧給予。○又議准。養育兵娶妻。視其父兄職分給予。若其父兄不在。應給之例。又別無依賴者。照馬甲例給予。向例養育兵除本身病故不照給予外。其祖父母父母喪事。仍視其祖父所食錢糧給予。其祖父若係閒散。照承辦人職分給予。無承辦之人。不准給予。嗣後養育兵及妻病故。准照馬甲例給予。其祖父



若係閒散亦准照馬甲例給予。至養育兵補門軍者。遇婚喪事。均照此例給予。○又議准。應襲騎都尉人員。因本身殘疾奉

恩旨。每月給食二三兩錢糧者。病故准照馬甲例給予。其子孫在應給之例者。婚喪事照本身所食錢糧給予。○又議准。八旗筆帖式庫使。內務府筆帖式庫使。畫一給予。○又議准。永食半分錢糧人等之子孫。未當差者。婚喪事照原食錢糧給予。○又議准。應給之兵丁人等。其祖父兄弟。雖係現任五品以上職官。不同居者。均照本身

所食錢糧給予。駐防外省現任五品以上官子弟之在京者亦如之。○又議准已故五品以上官之妻病故其子幼小尚未當差且無產業照承辦之人給予。○又議准革退官員兵丁人等病故其子孫若在應給之例者准照其子孫所食錢糧給予。至革退五品以上職官及革退兵丁等本身病故無嗣或子孫幼小實無產業者官員照馬甲例兵丁照原食錢糧給予。○又議准兵丁等婚喪事已經呈報未及領銀適遇父兄升遷五品以上職官仍行給予。○二年議准

恩賞銀每旗滿洲蒙古每月合領銀千兩。分給滿洲旗七百兩。蒙古旗三百兩。漢軍上三旗每旗給銀三百兩。下五旗每旗給銀二百二十兩。如官兵喜事。係豫先定有吉期。該參領佐領驍騎校領催族長等。公同保結申報。即飭令管庫官照例支給。如喪事需用促急。該族長領催等。各用本佐領圖記印領送庫。即行支給。該參領佐領等。出具保結。補行申報。以便覈銷。○又奏准鄭家莊漢軍驍騎校另戶兵丁人等婚喪事。照滿洲蒙古例給予。

恩賞銀○四年議准原食三兩錢糧之養育兵仍照舊例給予

恩賞外改食二兩錢糧之養育兵十歲以上者喪事給銀八兩。婚嫁事四兩。九歲以下者不准給。如伊父母事仍照例給予。○五年奏准嫁女之家如其父不在。或伯叔弟兄承辦者均一例給予恩賞銀。如並無同胞伯叔兄弟。或族中尊長親戚承辦者均照承辦人一例給予。又革退六品以下等官與革退五品以上職官身故無嗣。或有子幼小實無產業者。照馬甲例給予。又告休革退

護軍校以下等官及兵丁之妻在夫前身故者。如有子孫當差。按子孫所食錢糧給予。如無子嗣。或有子幼小尚未當差者。查明果無產業。告休官員之妻。照其夫原品級革退官員之妻。照馬甲例。告退兵丁之妻。照其夫原食錢糧。革退兵丁之妻。照步軍例給予。無嗣孀婦身故。如並無親族。及有親族而係聞散者。官員之妻。照領催例。兵丁之妻。照本夫錢糧。聞散人之妻。照步軍例給予。如無承辦之人。該佐領委領催一人。令其承辦。至兵丁父母喪及娶妻嫁女。如有在

屯居住者於報到佐領之日。一面取具該佐領族長等甘結。一面即行給予。又部院衙門貼寫效力筆帖式婚喪事。如所食錢糧在應給之例者。均照例給予。其食一兩錢糧效力之筆帖式。照食一兩錢糧執事人之例給予。在學肄業官學生。除五品以上官員之子弟。不准給予外。如無產業。其父兄又不在于應得之例者。照食二兩錢糧之養育兵例給予。○六年覆准婚喪事。如有捏報冒領。

恩賞銀者。將冒領之人從重治罪。其子孫永不准給。

予同居之伯叔兄弟內知情者照例治罪其子孫亦永不准給予。不知情者免議不行詳查以致冒領銀之參領佐領驍騎校領催族長並稽查之官照例議處。若事本屬實多行支領者照數追繳稽查官毋庸置議外將辦理舛錯之參領佐領驍騎校領催族長等分別議處。○又議准八旗婚喪

恩賞銀革退無嗣之官皆准給予則告退無嗣之官自應一例給予。至親軍校前鋒校與護軍校職分相同現在八旗均照護軍校之例辦理亦應

一例支給。十二年議准八旗武職內五品以上官之婚喪事。除同居之親子弟。兄。不準請領恩賞銀兩外。分居之子弟。兄若在應領之例者。視其本身給予。若其父兄係二品以上武職。三品以上文職者。仍不準給予。六品以下武職之祖父。母。父母本身及妻子女嫁娶等事。概入應領之例給予。此內惟藍翎侍衛。既由領侍衛內大臣處請領。則旗下毋庸重給。又奏准尚茶尚膳侍衛拜唐阿。如係旗人。按例由該旗請領。又奏准八旗勒令休致革職五品以上武官六品



以上文官病故一概不准請領六品以下武官  
七品以下文官內具呈原品休致者視其品級  
請領若勒令休致與革職者視其子孫所食錢  
糧請領如無子嗣或子幼尚未當差照養育兵  
例請領○又奏准閒散進士候補文職微員照  
馬甲例請領○又奏准閒散舉人貢生監生生  
員及自幼殘疾不能當差或無子或子尚幼小  
之間散人並現食孤寡錢糧人等均照養育兵  
例請領其寡婦視子孫之職分請領若無子孫  
或子孫幼小未曾當差視其夫之原食錢糧請

領。僮職分不應請領。原係閒散者。照養育兵例請領。皆各按本身品級給予。其親族人等承辦之處。永行停止。餘仍照定例遵行。○十五年議。准八旗。

恩賞銀停止。生息。凡應給婚喪銀。均於每月移取戶部長蘆兩淮鹽課銀支給。○十九年議。准食一兩五錢錢糧之養育兵。遇婚喪事。亦如食二兩錢糧之養育兵例給予。○二十六年奏。准八旗婚喪事件。指俸借銀之案。每半箇月彙送步軍統領衙門。逐案訪查。假捏者治罪。濫行保結者。

一併參處。○二十七年

諭朕念八旗官員每季俸銀坐扣之項過多。於生計不無拮据。特交軍機大臣將八旗婚喪事借給俸銀之處酌量調劑。今雖議准停止借俸。並將未完利銀寬免。及承借之銀展限坐扣。而官員等俸內所餘仍屬無多。於養贍家口當差之處。尚未能裕如。嗣後官員等停止借俸。其有婚喪事件。應作何酌量賞給之處。着軍機大臣即行議奏。欽此。遵

旨議定。公侯伯子爵俱照一品官員俸例。喪事給四箇月俸銀六十兩。婚嫁之事。給三箇月俸銀四十

五兩。男爵。照二品官員俸例。喪事。給四箇月俸銀五十兩。婚嫁之事。給三箇月俸銀四十兩。輕車都尉。三品文武官員。喪事。給四箇月俸銀四十兩。婚嫁之事。給三箇月俸銀三十兩。四品官員。喪事。給四箇月俸銀三十五兩。婚嫁之事。給三箇月俸銀二十五兩。五品官員。喪事。給四箇月俸銀三十兩。婚嫁之事。給銀二十兩。六品官員。喪事。給銀二十五兩。婚嫁之事。給銀十五兩。七品以下官員。喪事。給銀二十兩。婚嫁之事。給銀十兩。世職官員。照其頂戴。依職任官員俸例。

給予。凡八旗官員等之祖父母父母本身妻室等喪事及娶妻娶媳嫁女等事。俱由族長佐領確查與例相符者。咨報請領。各該旗仍將應領人數。並銀兩數目開列事由。咨報查旗御史查覈。○又奏准八旗滿洲蒙古漢軍在京三品以下文武官員。遇有祖父母父母喪事。請領賞銀者。如病故之人。原係在應得之例。仍照本身給予。不得以子孫官援引世職兼職任官員所兼職任在不應給予之例者。病故後雖有世職不得援引外。餘俱照銜之大者給予。官員娶妻。照

本身品級給予。若伊父亦係職官。不得復以娶  
媳請領。現任副都統以上武職。副都御史以上  
文職。例既不準請領。其祖父母父母病故。本身  
雖在應得之列。亦不得照本身請領。副都統以  
上武職。副都御史以上文職。本身病故。其子孫  
亦不得援引請領。其子孫娶妻以及病故。若本  
身在應得之列者。如係分居。照本身給予。如係  
同居。不準請領。各衙門額外行走官員。照銜給  
予。

賞銜食俸人員。在三品以下者。照銜給予。如在二品

以上者雖兼有職任不得請領

盛京

陵寢官員不准照本身請領病故後扶柩回京如有子孫係屬京員亦准照例請領在京三品以下官員內有銜大俸小者按其所食之俸銀請領休致食全俸官員照品請領休致食半俸官員照品減半請領食半俸世襲雲騎尉及年未及歲食半俸世職照品級減半請領在京三品以下降級留任並革職留任官員均按品級減半請領空銜頂戴不食俸不當差者不准請領因病

停俸世職及因病告退職任官員不准請領外任官員病故後扶柩回京其子孫不得援例請領緣事降調未經得缺官員不准請領下五旗王公包衣官員一概不准請領○又奏准侍衛處藍翎侍衛其本身事件仍給

恩賞銀四十兩由本處辦理其父母妻子事件由該旗支給○又議准六七品以下官員在部庫支領賞俸無品級之筆帖式與食餉之護軍校驍騎校俱按所食錢糧在旗庫支領賞銀○又議准八旗官員等支領賞銀該旗造冊咨部時並



造冊咨送查旗御史。以便稽覈。至支領銀兩。由各佐領呈報該旗大臣參領等。詳查合例。准其支領。喪事不得過五日。婚嫁之事不得過辦理之期。○二十八年議准。軍營病故之護軍校前鋒護軍等。按本旗賞銀給予。○二十九年議准。八旗滿洲蒙古漢軍在京居住人等。其祖父亦在京居住。或在城外園內居住者。均支給賞銀。若在莊屯居住之人。不准支給。○三十年議准。無嗣官員之妻病故。無嗣官員之女出嫁。均照養育兵之例。賞給銀兩。○三十二年議准。革職

留任降級留任之護軍校驍騎校等官仍照原職支給賞銀。○三十五年奏准城內八旗兵丁婚喪事故支領賞銀各該旗咨報步軍統領衙門由步軍校確查轉報覈對至城外八旗新舊營房兵丁賞銀由管理該營房大臣及查旗御史嚴行查察其在城外墜地居住者由看守三營地方官轉報步軍統領衙門查覈。○又奏准各省駐防現食養育兵錢糧孀婦病故及女出嫁者照在京八旗孀婦之例給予賞銀。○三十六年奏准兵丁革退者病故時如無子孫或

于孫年幼未及當差而無產業者照食一兩錢糧之例給予賞銀。四十一年奏准陣亡官員之無嗣孀婦身故時照領催例給予賞銀。四十二年奏准外藩王公及廷臣等賞銀由戶部支領覈銷如有緊急需用暫由廣儲司給發報明戶部照數發還廣儲司歸款。四十四年議准八旗孤女出嫁時照孤子例按其本身錢糧給予賞銀孤女病故亦按其錢糧給予但孤女既無倚靠此項銀兩係何人承領各該旗即於支領冊內註明報部至現食鰥寡孤獨錢糧者

亦一體於支領冊內註明以便查覈。○四十五年

諭朕從前有旨將直隸旗租銀仍賞八旗兵丁。經部議  
挑選八旗兵丁中差使勤慎者賞給兩月錢糧以示  
鼓勵。今思一人得兩月錢糧亦不能立家產不過隨  
手花費而不得賞者未免向隅且分別挑選該管官  
員不無瞻徇出入之弊殊非朕普惠八旗之意此後  
著將直隸解到銀兩足敷普行賞給八旗兵丁一月  
錢糧時該部即奏聞普賞一次。○四十六年議准各  
處駐防兵丁紅白事件照在京八旗兵丁紅白

事條款一體給予

恩賞銀○五十七年

諭熱河之額魯特等自駐防以來已三十餘載皆與滿洲兵丁一體當差而伊等婚喪事件向無恩賞著加恩嗣後亦照滿洲官兵例給予恩賞銀兩○六十年諭每年臘月於直隸解到旗租銀兩普賞八旗兵丁一月錢糧以為兵丁度歲之需本年此項銀兩屢經部催至今未據解到該兵丁等寒冬歲暮生計維艱若俟解到後再行給發未免遲緩著於部庫節年積存旗租項下先行撥給加恩普賞八旗兵丁一月錢糧

俟旗租解到再行歸款以示敷錫春祺恩膏速逮至  
意○嘉慶四年

諭八旗兵丁平日差操練習弓馬專藉所得錢糧用資  
養贍戶口日增不免生計維艱從前朕侍奉

皇考高宗純皇帝時每以此上綦

聖座時深軫念朕親承

慈訓敬誌弗忘原擬明歲恭遇

皇考九旬萬壽舉行慶典自必錫惠旗營普加恩賚今  
朕不獲祝嘏承歡以申孝養而

皇考體恤八旗之意仍應推廣

深仁俾得共霑

遺澤恭查雍正元年乾隆元年

恩詔八旗兵丁曾賞一月錢糧朕於嘉慶元年登極亦照前例舉行所有八旗滿洲蒙古漢軍各兵丁等今著再行加恩賞給一月錢糧八旗兵丁朕屢經降旨飭令勤加訓練熟悉技勇近聞該兵丁等因日用拮据甚至弓箭不能整齊今得此賞項俾資霑潤並可為補製弓箭之用現在錢價較貴若賞給銀兩易錢未免虧折而戶部局錢尚屬充裕著按照官例每銀一兩折給制錢一千文較之市價該兵丁等更可多

得錢。於生計更爲有益。而錢價亦可平減。至戶部局員發放官錢。或從中折扣。錢數不足。此等弊端。恐所不免。著責成管理錢法堂之王大臣。嚴行督率。實力稽查。務須照數實給。不許短少。扣剋。僮有前項情弊。經朕察出。或被糾參。惟該管錢法堂之王大臣。是問。至戶部放錢。已嚴禁短缺。各該旗員赴局關支。有需運腳。恐承領之員。又復以運費藉詞。從中剋扣。則該兵丁等。不能普霑實惠。著各旗准其動用房租。各營則動用公費。作為運腳。並著該管都統副都統及前鋒統領護軍統領等。實心稽查。嚴行管束。務令將



所領恩賞錢文照數散給各兵。僮既有動支腳費而承領旗員尚有私行短扣者。即據實嚴叅懲辦。若該管大員不行查出。別經發覺。必當重治其罪。仍著步軍統領衙門將此旨刊刻謄黃。張挂通衢。並分行發給各旗分及健銳火器等營。一律實貼宣示。俾得家喻戶曉。以副朕繼志推恩加惠旗營至意。○又定八旗兵丁有自盡身死者。由該旗查明實無畏罪情由。其本身賞銀並伊妻周年半餉均准支領。○八年。以川陝楚三省邪匪蕩平。元旦祥雲溥被。加賞八旗兵丁一月錢糧。○道光四年

諭據戶部奏請先期支放閏月甲米以裕兵食而平市價向例有閏之年均有恩賞八旗甲米計十六萬三千餘石本年閏七月恩賞該兵丁等米石著加恩於本年三月豫領即由戶部定限割倉開放俾資接濟若閏月全行坐扣該兵丁等餬口維艱本年閏月甲米仍准屆期支領其豫領閏月米石自本年七月起分作四季扣還現在豆麥均屬昂貴除黑豆業於春俸分別抵放外其漕麥一項俟三月抵通後即照例於粟米內儘數抵放如有餘贖再於稔米內抵放務令雜糧一律流通市價不致騰貴再八旗藍白步甲

之未前經戶部奏請半放折色著該部仍照舊章全  
行放米毋庸折色搭放。十二年奏准嗣後駐防官  
員車價一項其由京攜眷赴任者給予車價口  
糧草束一次如自京派往時領過一次者至後  
升任調任概不准給。若家屬本未隨任未經領  
過者後雖升任調任而家屬係初次由京赴任  
亦補給一次。咸豐三年

諭八旗都統奏遵議紅白賞卹分別酌辦一摺八旗官  
員紅白事及兵丁紅事賞卹銀均暫行停止八旗兵  
丁白事卹銀仍照舊賞給一俟庫款稍充再行查照

舊章辦理。○八年奏准停放八旗兵丁白事賞卹銀

○同治四年議准自五年正月起將八旗兵丁  
白事卹賞銀兩按照例定銀數減半放給。○十  
一年奏准離營人員傷發亡故在一年內者給  
予卹賞。若逾一年限外仍行奏駁。○光緒六年  
奏准現由各省解部飯銀項下提出銀兩。豫放  
八旗兵丁一次賞卹。以各旗之多寡定銀數之  
等差。豫放滿洲銀五百兩。漢軍三百兩。蒙古二  
百兩。合計八旗應豫放銀八千兩。分存各旗庫  
備用。仍令各旗按月將病故兵丁花名及應領

減半銀數造冊送覈。劄庫送給。除補放兵丁二  
成外。餘銀八成歸款存庫。以便按月接續給發。  
年終彙報奏銷。

欽定大清會典事例卷一千一百四十

八旗都統

優恤

老幼官兵俸餉

出征官兵恤賞

賞

老幼官兵俸餉。○順治十二年題准。世爵亡故無人承襲者。其妻照伊夫應得俸銀俸米之半。養贍終身。○康熙十年題准。世爵病故將官註銷者。如其妻已故而原立爵之人親母尚在。仍給半俸。若原立爵人之母已故而襲世爵人之母尚在者。亦給半俸。繼母與生母同。○三十三年題准。未及歲承襲人員。不上朝當差。止給半

俸。長成後支給全俸。○雍正二年覆准。無嗣之  
世爵與族人承襲者。原有分給俸銀養贍之例。  
嗣後此等襲爵之人。該參領佐領及族長等。將  
俸餉三分之一中分出一分。養贍本家之寡婦。其  
原管佐領及世管佐領一族中輪流承襲者。毋  
庸分給。○十二年議准。八旗致仕官身有世爵  
者。照不及歲未上朝之世爵例。給予半俸。○十  
三年議准。凡官兵身故。無論其妻年歲有無子  
嗣。情願守節者。照例給予半俸半餉。○乾隆元  
年

諭凡大臣中有引年求退奉旨以原官致仕者皆係宣  
力有年素為國家優禮之人雖經解組仍當加恩以  
示眷念耆舊之意現在滿漢大學士暨曾為部院尚  
書予告在家者均著照其品級給予全俸在京於戶  
部支領在外於該省藩庫支領永為定例○三年議  
准武職年老告休曾經出征臨陣受傷及得有  
功牌者覈實請

旨令其原品休致給全俸以養餘年其出征並未臨  
陣及無功牌者請

旨令其原品休致給半俸其效力有年並未出征者



仍照例休致。○三年

諭大學士尚書內原品休致大臣給食全俸。永為定例。從前諭旨。如自奏乞休。朕加恩准令原品休致者。著即照此旨給食全俸。其遇京察自陳。朕加恩准令原品致仕者。該旗該部以應否給食半俸具奏請旨。若非自行奏請。朕特旨令其原品致仕及遇京察自陳部議致仕者。不必給食俸祿。至於八旗武官具呈告退。皆有量其軍功給食俸祿之例。嗣後一二品武職大臣。若自行奏請。朕加恩准令原品致仕者。著該旗查其軍功及食俸年分。以或給全俸。或給半俸。具奏

請旨。若非自行奏請。朕特旨令其原品致仕者。不必給食俸祿。○又奏准。八旗賞給半俸半餉官兵身故。其寡婦不便於半俸半餉之中復行減半。仍給予一年半俸半餉。如未及支領一年半俸。其世爵已經承襲者。除子孫及親兄弟承襲不必給領外。若族人承襲。其世族既已較遠。寡婦周年半俸。仍許支領。○又奏准。八旗未上朝之世爵。例應支食半俸。其絕嗣之世爵雲騎尉。經八旗都統議定。給予半俸銀米。如承襲此等世爵之人。有年幼未上朝者。不便於半俸之中減半支

給嗣後凡承襲絕嗣之雲騎尉。如有年幼未上朝者。照伊應食半俸之數支領。○又奏准八旗陣亡官兵之寡婦。或絕嗣。或子孫年幼無錢糧者。業蒙

恩賞。照其夫原食俸餉給予一半。此等寡婦之子。有補養育兵者。因其子已食錢糧。遽將一半俸餉裁去。恐致拮据。嗣後仍給一半俸餉。俟其子長成當差。所食銀米足抵寡婦一半俸餉之數。再停支領。○四年奉

旨。朕從前曾降諭旨。世爵內有年老具呈告退者。令其

兄弟及兄弟之子承襲後。再將應否給食半俸全俸之處請旨具奏。今思年老解退之人。若有世襲佐領令其子承管。俸祿便致重複。嗣後告休人員內。如有軍前效力本身有世襲佐領者。該旗將其兄弟之子承襲。仍賞給俸銀。若其子承襲。將毋庸給俸之處具奏請旨。餘仍照舊例。○五年議准。八旗開戶兵丁。其寡婦錢糧不應給予。至軍前定為一二等作為另戶之開戶人等。其寡婦仍給予錢糧。則出征效力得過功牌受傷及陣亡之開戶人等。亦應照另戶之例。給予寡婦錢糧。○又奏准。前鋒護

軍另戶領催馬甲人等內。因患病或傷殘退伍。及六十以上年老退伍。如曾在軍前行走臨陣。得有軍功者。該管大員覈實。無論有無房產。並有無子孫現在食錢糧者。均每月給銀一兩米一斛。以養餘年。若在軍前行走並未臨陣立有軍功者。亦行勘實。除有房產尚可度日。並有子孫現食錢糧外。餘皆每月給銀一兩。以養餘年。以上應給養贍之退伍兵丁。由該管都統副都統等咨報兵部。由部每年彙奏。若未經效力假捏咨送。及尚堪當兵之人。希圖坐食錢糧。捏稱

有病傷殘年老退伍者。本人治罪。該管官並該管大員交部議處。其游牧地方兵丁。概不准給。盛京甯古塔等處駐防兵丁。止准給銀。不准給米。○六年奏准。駐防官員兵丁身故。寡婦情願歸旗者。俟到京後。照在京八旗之例。支給半俸半餉。願留彼處。倚子孫及兄弟之子。養贍者。不論年歲有無子嗣。該管官具保。給予一年半俸半餉。如係食半俸半餉官兵之寡婦。亦照其夫所食半俸半餉之數。給予一年。世爵子孫已經襲爵得俸者。寡婦半俸停止。再在京開戶養子。

兵丁出征受傷得功牌及陣亡者。其寡婦給予  
一年半俸。各處開戶養子之寡婦。亦照此例辦  
理。○又議准。世爵十八歲。世襲佐領十六歲。上  
朝當差。均准食全俸。各旗內亦有世襲佐領兼  
世爵者。年至十六歲。應食何官全俸。從前並無  
定例。嗣後世襲佐領兼世爵者。至十六歲。應領  
全俸時。除世爵之俸少於佐領之俸者。應食佐  
領全俸外。如世爵半俸較多於佐領之全俸者。  
仍食世爵半俸。若與佐領全俸相等。或半俸少  
於佐領之全俸者。令食佐領全俸。俟至十八歲

再領世爵全俸以昭畫一。○又議准。向例旗下大臣病故者。由該旗咨送吏部查明轉咨禮部給予祭葬。今八旗武職大臣病故。皆咨兵部轉行禮部查辦。嗣後八旗文武大臣病故。應請卹典者。由該旗分別移咨吏兵二部查覈。行禮部具題。○又議准。八旗兩翼步軍協尉等有老病告休者。該都統查明有無軍功。應否給全俸半俸以養餘年。具奏請

旨。游牧察哈爾護軍校告休者。該總管呈報統領查明辦理亦如之。○又議准。增養育兵錢糧。凡鰥



寡孤獨不計年皆准選取。○又議准嗣後無嗣無依之孤身寡婦給予養育兵錢糧養贍終身。○又議准八旗外任武職老病休致曾經出兵效力者照在旗武職之例分別優恤。其外任文職曾經出兵打仗受傷者亦照在旗武職之例辦理。○七年議准下五旗公中之包衣佐領內如有並無養贍之人照上三旗內管領下絕嗣孀婦之例按月給銀一兩。家口多者再給予米一斛。家口少者每月止給予銀兩。俟日後或補馬甲或分給諸王再將錢糧裁除。○十八年奏

非隨任幼官不得支給半俸。俟回京後報明旗部再行照例給予。其外任告休營員內有因軍功蒙

恩賞給全俸半俸者俱按原品的減一等。照在京旗員之例一體支給俸銀俸米。外任告休文職內有因軍功

賞俸者亦照此辦理。至八旗駐防官員告休歸旗有因軍功

賞給全俸者其俸米照京員之例一體支給。○又奏  
我宗室覺羅內現在

陵寢地方及

盛京等處官員之隨任子弟。照在京支領錢糧。至  
隨往外任者。不得支領。俟回旗後照例給予。○  
十九年覆准。八旗另戶另記檔案之孀婦。一體  
支食周年半餉。○二十二年

諭。近來原品休致之年老各部院司員。均當差年久。且  
有曾經出征者。著加恩交與該旗查明。有量能當差  
之人。照伊等品級。或以

壇

廟官用。或以步軍校等官用。其不能當差者。著照武職

例。曾經臨陣者。賞給整俸。雖出征而未臨陣者。賞給半俸。包衣官員。亦著照此辦理。○二十三年定。旗人充補綠營官員後。或休致。或身故。即照所任辦理。不得請俸。○二十七年奏定。由駐防回京之孀婦。支領周年半俸米石。俱按其夫之品級。照依在京米色數目支給。○二十九年議准。將裁汰烏槍營馬甲米石。並移紮熱河馬甲米石。均勻分給無米之養育兵。每名一石八斗八升。春秋二季支領。○三十五年奏定。三品以下官員。因老病呈請休致者。無論年歲。俱准以原品休

致仍照例分別五十六十以上。以及出師打仗有無功牌。或應否給食全俸半俸。聲明請

旨。其或入軍政或被叅劾勒令休致者。不得食俸。○又覆准。駐防養育兵丁孀婦守節。照在京八旗孀婦例支食周年半餉。○三十六年奏定。鰥寡孤獨人等。毋庸分估養育兵額缺。每人每月另給養贍銀一兩五錢。○三十九年奉

旨。嗣後無論旗人補用綠營。及綠營中漢員遇有陣亡議廢。其子孫年未及歲者。仍著一體加恩賞給馬糧一分。著為令。○四十一年議准。八旗孀婦內如翁及

親伯叔兄弟。係現任五品以上武職。六品以上文職。以及外任職官。與有翁姑子媳親孫現食錢糧。並有房地者。不得給予錢糧。若係叔翁及親姪族姪族孫現任職官者。俱准給予。又孤子內有母現食

恩賞錢糧者。毋庸給予錢糧。其無母餉可依伯叔兄弟係微員食餉者。俱准給予錢糧。餘與孀婦同。又孀婦之親伯叔等。如係候補六品文職。及離任養病降調之外任職官。休致及革職。給有頂戴之廢員。並加級升銜。非現任職官者。均准給

子錢糧。俟伊伯叔等起用之日。報部裁除。至孀婦雖有子孫。或派往駐防。或獲罪發遣。或現已在逃。或繼子歸宗實無依賴者。亦准給予錢糧。○四十二年奏准。告休之員。其所兼世職。仍留給該員本身。俟其身故。再行照例辦理。如兼世管佐領者。照例另行承襲。如係伊子承襲。毋庸另行請俸。如兄弟之子承襲。聲明請

旨。○四十三年奏定。八旗孤女。其父已故。並無食餉之親。祖父母及母並親兄弟。又無產業。亦無現任職官之親伯叔者。照孤子例。給予一兩五錢。

錢糧米石。俟出嫁後再行裁汰。○四十四年議  
准。有父兄獲罪發遣及在逃者。其女無依。照孤  
女例。給予錢糧。孤女依靠親族及伯叔支食錢  
糧者。果無食餉之親祖父母及母並親兄弟。又  
無產業。其親伯叔係微員兵丁。或護軍校委署  
護軍參領。仍食兵餉者。亦准給予錢糧。孤女有  
姊妹二三人者。先儘長女支給錢糧。俟長女出  
嫁後。裁汰錢糧。再行按次添支。○四十七年

諭嗣後由外任呈請回旗人員內。有本身承襲世職者。  
該旗詳加驗看。如尚能當差。加恩將世職仍留本身。



賞給全俸。如不能供職。經該管上司勒令休致者。雖有世職。不准支領俸祿。著為令。○又奏准。八旗陣亡人員。其子年未及歲者。其妻仍照例食伊夫半分俸餉。俟其子及歲。應食半俸之時。再將孀婦所食俸餉停止。○四十八年。覆准。八旗陣亡官兵之妻。前係再醮者。亦一律給予半餉。○五十九年。奏准。內外三品以下官員。因老病告休。曾經出征打仗。殺賊捉生受傷者。年至六十以上。俱以可否給予全俸請

旨。五十以上者。俱以可否給予半俸請

旨。其出征打仗而未經殺賊捉生受傷。及出征未經打仗而得有功牌。並出征三次以上未經打仗者。年至六十以上。俱以可否給予半俸請。

旨。五十以上。俱以可否給予半俸之半請。

旨。其出征僅止一二次及並未打仗未得功牌者。原品休致。毋庸給俸。其年僅四十以上。雖出征打仗得有功牌。亦准其原品休致。毋庸給俸。至旗人身任綠營武職。休致歸旗。即照綠營例辦理。如該員本身兼有世職者。歸旗後尚能當差。將世職仍留本身。給予全俸。若係勒令休致者。雖

有世職不准給俸。○嘉慶四年奏准。凡患病告  
休人員。其有殺賊捉生受傷各項功績俱全者。  
年至五十以上。即以可否給予全俸請。

旨。若僅止出征二三次。並未打仗得有功牌者。雖年  
在六十以上。亦止准其原品休致。毋庸給予俸  
祿。○九年奉

旨。此後勒休武職人員。有出征受傷在三處以上。又無  
貪私劣迹。無論年歲俱給予半俸。○二十年

諭。陳預等奏調劑青州駐防滿營兵丁一摺。山東青州  
駐防滿營額設馬甲一千四百六十名。步甲三百二

十名。茲據奏稱該滿營兵丁素稱得力。生齒日繁。若增添馬步甲兵。需餉較多。其壯丁一任閒散。又殊可惜。自應設法調劑。著照所請。准其將該滿營所存馬價銀六千兩。再於司庫扣存市平內酌提銀二萬四千兩。共成三萬兩。交商一分生息。每歲息銀三十六百兩。隨餉撥解。交該副都統在於駐防八旗閒散壯丁內擇其材堪造就者二百四十名。作為餘兵。與甲兵一體操練。每名每月支給銀一兩。以資養贍。除支給餘兵餉銀二千八百八十兩外。每歲所存餘息銀七百兩零。即陸續歸還原款。○道光十二年奉

旨休致副都統閣凌阿。曾出湖北兵一次。打仗四十八次。殺賊八名。受傷一處。著賞給半俸。以養餘年。嗣後若非自行呈請。奉旨令其休致人員。副將以下仍照例辦理。副都統總兵以上。著兵部查明該員有無軍功勞績。及食俸年分。奏明請旨。

出征官兵恤賞。○雍正三年議准。出征兵丁內。或並無家口。其餉銀無人收存者。各該旗佐領。封固。開明旗分佐領姓名。並出征之地方。彙齊咨送兵部。遇有戶兵工三部解送官物之便。搭解軍營。交與本身收領。仍將收到之處咨覆存

案。應領月米。造冊送戶部扣留存倉。俟凱旋日。按照扣存數目支給。若本人雖無家口。情願將銀米存交親屬代為置辦衣服什物者。該旗於出征兵丁起程之前詢明。准交親屬收存。○十年

諭西北兩路出征之滿洲蒙古漢軍大小官員等。於起程時。朕令多定跟隨人數。其家中親隨兵銀米仍留為該員家口養贍之資。並未令其裁革。今戶部於本年三月間行文各處。以各官在外既有親隨兵。家中不應重領銀米。將各官親隨兵銀米。停其支領。且自

雍正七年大兵起程之日為始。凡家中領過銀米。於本人應領俸銀俸米之內。照數坐扣還項。甚屬錯謬。殊非朕體恤出征人員之意。著曉諭八旗人員。凡軍前大小官員等家中已領之親隨兵銀米。不必扣還。其應領之項。仍照常給予。○乾隆五年

諭。朕覽兵部纂修則例。內稱從前進藏出兵之官。及受傷病故官兵。所有豫借銀免其追還。係出自特恩。未便纂為成例等語。朕思兵丁捐軀行陣。情實可憫。其豫借銀理應豁免。若必待特降諭旨。恐其中不無一二遺漏。著永為定例。凡遇有此等。該部即援例請免。

則恩錫之典可垂永遠矣。○二十三年議准革退兵丁仍留軍營效力者。照革職官員仍留軍營效力給予俸銀之例。給予應食錢糧。○三十三年議准凡出征病故官兵在五百里以外者。照例給予

恩賞銀兩。五百里以內者減半。若僅在一兩站病故者。不准給予。○三十四年奏准軍營人員未進兵之前。頭等侍衛護軍參領等。每員借給銀四十兩。二等侍衛副護軍參領等。每員借給銀三十兩。三等侍衛藍翎侍衛委署護軍參領等。每



員借給銀十兩。前鋒護軍等。借給銀六兩。侍衛  
章京於俸銀內作二季扣還。護軍校前鋒護軍  
等。於所食錢糧內作六箇月扣還。○四十一年  
議准。進勦兩金川大功告成。照乾隆十四年平  
定金川。二十年平定準夷。二十四年平定回部  
三次。

恩詔條款。所有軍營前後奉調馬步兵丁。借支行裝銀  
兩。例應於回營扣還者。展限三年坐扣。至滿洲  
兵丁披甲隨征效力。被傷不能披甲。及年老有  
疾退閒者。每名給梭布七疋。白布三疋。其有仍

食原餉及曾給錢糧養贍者。即照所食錢糧給予。毋庸辨給布疋。

貸給庫帑。康熙年間定八旗設立公庫。存銀借給旗下官軍。○五十三年。裁八旗公庫。停止旗人領借公庫銀。○雍正五年。

諭兵丁等婚喪事。已加恩賞銀。大小官員內有家資饒裕者。亦有家計艱窘者。偶遇喪事。倉卒之間。必至窘迫無措。嗣後八旗大小官員內。若遇喪事。有情願借銀者。著戶部借給四月俸銀。至下季扣除。若遇未及扣除之前緣事。革職者。除世爵外。仍令其賠補。如病

故者。著即賞給。免其賠補。至行取戶部庫銀。恐一時不能即得。先將旗下恩賞兵丁銀給予。再行取戶部庫銀還項。○乾隆五年

諭八旗官員。有平日指俸借支官銀。以及抵買入官房地。皆應指俸還項。如該員遇有罰俸處分。即應照數補交現銀。此乃該員借用及置產之私項。部旗理應按限催交。毋庸復從寬緩。但念該員既罰本俸。復措現銀。併在一時。未免生計拮据。嗣後罰俸之旗員。如有應扣雜項銀。著照舊按數坐扣。俟完項之日。再扣罰俸銀。若扣還雜項之外。尚有餘俸。即將餘俸陸續

扣足所罰之數。不必勒補現銀。至該員所罰之俸。未經扣完之日。亦不許再借別項。如該員遇有喪事。准借四月俸銀。亦著展限扣還。○七年

諭八旗兵丁人等。不務生計。平時不知節儉。及受困一時。計解然眉。重利借貸。現今生計益至窘迫。應如何施恩。運籌措辦。令其不至重利借貸。於生計有所接濟之處。著軍機大臣詳議具奏。欽此。遵

旨議定。前鋒校護軍校驍騎校准借銀三十兩。前鋒護軍領催准借二十兩。馬甲准借十五兩。均以五釐作息。每月前鋒校護軍校驍騎校坐扣本銀

一兩。前鋒護軍領催坐扣銀六錢。馬甲坐扣銀五錢。十月後前鋒校護軍校。驍騎校。我借銀十兩。前鋒護軍領催。我借六兩。馬甲。我借五兩。如不願借者。各聽其便。食二兩錢糧。兵丁人等。不准借給。令各旗覈明應借數目。造冊咨部領給。每月入於錢糧冊內。由庫坐扣。其借銀人員。有病故年老告退者。准其豁免。獲罪之人。著落家產。子孫賠補。如實無家產。子孫不能賠還者。該旗查明出結。照例治罪。所欠銀亦准豁免。年終彙奏。不能賠還之銀。於所贖利銀內陸續扣補。

副護軍校。副驍騎校。亦准借三十兩。覺羅前鋒  
護軍。准借二十兩。借銀後。馬甲拔補前鋒護軍  
領催者。前鋒護軍領催升補護軍校。驍騎校者。  
俟原借銀扣完十月。再准找借。新補兵丁。即照  
應得數目。補行支借。再因買官房地。畝人口。於  
欠官銀。除官扣外。下欠錢糧。不敷坐扣本銀者。  
不准借。足扣者。仍借給。弓匠族長等。亦照護軍  
領催之例。准借銀二十兩。附入蒙古旗下之額。  
魯特。回子。護軍等。不准借給。親隨兵。亦不准借  
給。借銀兵丁內。或升補官員。承襲世爵佐領者。

將未經扣完本利銀入於俸冊內坐扣完結。○  
八年議准。官員俸銀已有別項坐扣。如遇喪事。  
不論俸銀有餘與否。均借給四月俸銀。○十一  
年奏准。隨圍人員。如有未經起程之前病故。及  
患病不能隨圍。在家病故。與在途病故者。所領  
恩賞銀。及借過一年或半年俸銀。業經製辦行裝。費  
用無存。均免其繳還。○十二年奏准。借過滋生  
銀。官員內有隨圍者。其本利銀。一併展限一季。  
於下季坐扣。○十五年議准。八旗大小官員。遇  
有喪事。借六月俸銀。喜事。借四月俸銀。○二十

三年奏准。凡管理屯田事務大臣。得借支二年俸銀。回京時照數坐扣。○二十七年定。官兵婚喪事件。停止借俸給予。

恩賞銀兩。○三十五年奏准。獲罪革退兵丁未完庫銀。並無家產子孫不能賠還者。該旗仍舊出具印結報部。○四十二年奏准。各處駐防官員。如有應行修理房間之處。將應行如何修理據實查驗造冊報部。修理完竣後。報部覈銷。動借何項銀兩之處。俱照地方官修理衙署之例辦理。其銀兩之數。協領准借二百四十兩。佐領二百



兩防禦一百六十兩。驍騎校一百二十兩。筆帖式八十兩。不准過多。分作八年。於伊等俸餉內坐扣。如有先次支借尚未扣完者。不准再借。○四十三年議准。江甯京口駐防官員官房。應修之處甚多。准其在於存儲馬價鹽規二項支借。仍按八年扣還。其零星修補者。酌定銀數。於四分之中借給一分。作為四年扣還。○四十五年奏准。看守通倉八旗兵丁。照清河兵丁之例。一體借給庫銀。即於所食餉銀內按月坐扣。○五十九年

諭本年春間得雨稍遲。入夏後雨水較多。現在錢價過賤。自因銀兩短少之故。其錢價既賤。物價未免昂貴。官員兵丁生計稍艱。著加恩。王以下滿漢各官。俱賞借半年俸銀。其閒散宗室覺羅八旗兵丁。各賞借半年餉銀。均作為三年按季按月扣還歸款。以示朕加惠官兵恩施無已之意。欽此。遵

旨議定。此項借給俸餉。總以欽奉

諭旨之日為準。如官員升轉及兵丁升挑差使。在奉

旨日期以後者。仍照原食俸餉借給。王公武職大臣官員借員借支正俸。暨各部院經制文職大臣官員借

支

恩正俸銀。各按每季俸銀借給。革職留任及停俸住俸人員。不准借給。降級留任官員。按所降之級借給。緣事部議罰俸人員。照品借給。先儘坐扣借俸。餘銀再扣罰俸。如曾奉

特旨及自行奏請罰俸者。不准借給。出差人員。並在京支俸之

盛京

陵寢官員。及在京支領餘俸之世職兼外任職官。均毋庸借給。現食半俸半餉官兵。照所食銀數借給。

上三旗包衣食餉執事人等。及下五旗包衣護衛官員甲兵等。均照俸餉銀數借給。在京領餉之八旗看守通倉兵丁。一體支借。八旗官學生膏火銀兩。准其支借。食終身半俸。半餉。孀婦及鰥寡孤獨人等。均准支借俸餉。至食周年半俸半餉。孀婦並食錢糧之孤女。不准借支。隨甲不准借支。步甲領催。步甲鐵匠。如係另戶正身充當者。准借。其由戶下家奴挑補者。不准借給。

六十年

諭去歲春間得雨稍遲。入夏後雨水較多。錢價甚賤。物

價甚昂。官員兵丁等不無艱窘。因賞借半年錢糧於兵丁生計有裨。且銀兩既多。錢價自得其平矣。其賞借之項。原定為三年扣還。朕臨御六十年。身體甚屬康強。來年歸政。實從古稀有之盛事。况本年九分年景。十月間又得盈尺瑞雪。此皆

上天眷佑朕躬。申錫

鴻慈。正宜廣沛恩澤。所有去歲賞借錢糧兵丁。彼時雖稍覺寬裕。但令按月扣還。又照例坐扣庫銀。所有銀糧無多。反致拮据。著加恩將未完之項。概行寬免。以示朕體恤兵丁。推廣恩澤至意。○嘉慶三年定。獲罪

革退兵丁。本人實無產業。雖有兄弟子姪人等  
係食二兩錢糧者。該旗查明出具參領佐領印  
結。其未完庫銀。准與寬免。毋庸治罪。○六年

諭自六月初一日起。至今數日。雨水連綿。兵丁所居房  
屋倒塌者甚多。於生計大有關繫。朕心不勝矜恤。著  
加恩將八旗包衣三旗兵丁所借之庫銀內。本年七  
八月應行坐扣者。俱展限兩箇月。至九月再行坐扣。  
以示朕矜恤兵丁至意。○七年議准。官員兵丁有豫  
指俸餉製造弓箭撒袋腰刀者。該旗造冊咨部  
照式製造。官於四季俸內扣還。兵丁等於十二

箇月錢糧內扣還。○二十四年

諭。英和等奏加賞各旗並修葺官房各一摺。朕念八旗公用不敷。令內務府大臣等籌款生息。動支。茲據英和等議請將積存房租大制錢五萬串。交商生息。每年可得息錢六千串。著即照所議加賞八旗滿洲旗分二百五十串。蒙古旗分一百串。漢軍一百五十串。其餘錢文二千串。按年歸款。請借大制錢七萬串。生息以為修理官房之用。亦著照所請辦理。此項生息錢文。即交總管內務府大臣等選派司員三四人承辦。按年交息。分別給領還款。由該大臣等據實覈銷。

○道光二年奏准八旗逃走及獲罪兵丁未完庫銀著落有兄弟子姪子孫按月賠還若無代扣之人具結寬免不得入於孤寡錢糧內代扣其支食孤寡錢糧以及周年半俸半餉者一切應扣款項報部寬免○九年

諭朕恭謁

祖陵駐蹕盛京八旗官兵等承辦差務先經奕額等奏准每員借給一年俸銀每兵借給半年餉銀於盛京庫貯銀內動支分作四季坐扣於二年內歸款但念該官兵等踴躍趨公若將借項按限扣繳轉無以示



體恤所有奉天官兵此次借支俸餉銀九萬六千七百二兩零著加恩寬免銀四萬六千七百二兩零其餘銀五萬兩著分作十年於該官兵俸餉內扣還○

光緒十二年

諭戶部奏查明八旗重支庫銀著落分賠並釐定章程開單呈覽一摺此案各旗浮領庫銀前經降旨派令各該都統等查明數目花名分析咨部覈議茲據戶部按照各該旗所報各冊查出重支數目有一萬二千五百餘兩之多自應著落分賠歸款著照該部所擬分成賠繳勒限半年繳清戶部俸

餉處司員稽覈冊檔是其專責。何以於各旗營餉冊舛錯漫無覺察。該部堂官未能查出。亦有失察之咎。除員外郎鍾英首先查出。准予免議外。所有戶部堂官及俸餉處承辦各司員。均著查取職名。交部議處。俸餉處書吏蒙混舞弊。大干法紀。亟應嚴行懲辦。所有各股經承。該部擬以杖六十徒一年。不足蔽辜。著改為杖一百。徒三年。以示懲儆。八旗支領庫銀積弊甚深。不可不認真釐剔。此次戶部所定章程十條。尚屬周密。嗣後該部及各該旗務當詳慎稽覈。實力奉行。不准再有絲毫弊混。

